

REGIONAL NEWS

HEADLINES:-

1. Chief Minister Pu Lalduhoman Sawhthing lei leh hralh chungchangah Grade A leh B a awm lo ang a ti.
2. Mizorama khaw 263 ah Sawhthing a tam a, chhungkaw 6586 a nghawng mek.
3. Vice President Jagdeep Dhankar chuan vawiin khan New Delhi-a Bharat Mandapam atangin Har Ghar Tiranga Bike Rally a vailiam.
4. Nepal Forest and Environment Minister Ain Bahadur Shahi Thakuri chuan fur ruahtui tlak laiin thing tiak maktaduai 10 tal phun turin an hnuai thawktu hrang hrangte a hriattir.

<><><>

CM

Chief Minister Pu Lalduhoman Sawhthing lei leh hralh chungchangah Grade A leh B a awm lo ang a ti.

ZPM General Headquarters a General Secretary ten Chief Minister hi nimin khan a Office ah hmuin, sawhthing Grade A leh B siam tumna chungchang an sawipua, Pu Lalduhoma chuan, ruahmanna hmasa ah chuan sawhthing lei leh hralh chungchangah Grade A leh B siam tumna a awm a, hei hi an sumdawnpuite nen thawhhona tha leh tlo an neih theih nana ruahmanna a ni a, amaherawh chu mipui lamin Sorkar ruahmanna hi an hriatthiam chiah loh avang leh kuthnathawktute rilru a hnual ang tih hlauin he ruahmana hi mipui hriatthiam zawnga her rem a ni a, Grade A leh B a awm dawn lo a ni, a ti.

Hetih lai hian sawhthing chingtuten an hralh dawn hunah an sawhthing chu a fai tha hle tur a ni a, rilru pamham pu leh hlawk tum lutukna avanga insumdawn tawn nana him lo thil lo ti an awm a nih chuan, a hralhna kawnga harsatna an tawk a nih pawhin sorkawin mawh a phur dawn lo a ni, a ti a, Chief Minister chuan, "Thlai thar lei hi Sawrkar Flagship pawimawh ber a ni a, inthlan hma atanga mipui hnena an lo aupui tawh a ni a, kuthnathawhtute khaichhuahna tura hmalakna pawimawh tak a ni a ti.

Pu Lalduhoma chuan mipui an ti beidawng thiang lo tih sawiin an ruahmanna a hlawhtlin theih nan helama mawhphurtu ten ngawrh takin hna an thawk mek a ni a ti a. Tlaithar lei leh hralh chungchangah hian hnam dangten Mizote chu hnam rinawm leh sumdawnpui tlakah min ngaise an duh a, tunhma thil avanga mipui rilru puthmang lo kal diktawhlote pawh siamthat beisei a ni, a ti.

<><><>

OPERATION GINGER

Mizorama khaw 263 ah Sawhthing a tam a, Horticulture Dept chhinchhiah danin heng khaw 250 chuanga sawhthing chingtu chungkaw 6586 te Sawhthing a tam tan tawh a ni.

Sawhthing tam chungchang hriat a nih avang hian Horticulture Department chuan hma la nghalin vawiin khan Horticulture dept a Officer leh Field Staff ten Sawhthing tam leh natna ven dan leh enkawl dan an zir a, Training of Trainers on Operation Ginger - Management of Pest and Diseases on Ginger hi Horticulture Conference Hall ah an buatsaih a ni a, Training hi Horticulture Director Pu C.H. Lalmuanpuia chuan a kaihuai a, Dr. H. Vanlaldiki, Dy. Director in zirtirna pe in Mizoram pum atangin thawktu an kal a ni.

Horticulture Dept chuan kumin ah Zoram pumah Sawhthing ching an tam thu an sawi a, Sawhthing a tam tan avang hian Horticulture dept chuan mipui tam zawkte zirtir nan cable tv a chhuah turin Horticulture mi thiam ten a hmunah an kal chilh a ni.

Vawiin training hi Zoram puma Horticulture hnuaiia thawk ten ko kim zawka inzirtirna an neih theih nan buatsaih a ni a, Aug ni 16 hian Horticulture Minister Prof Lalnilawma chuan Sawhthing tam beihpui thlakna 'Operation Ginger - Fehchhuah Runpui' chu Horticulture Office atangin a vai liam dawn a, horticulture a thawkten district tin tuamin an fehchhuak thin dawn a ni.

<><><>

MALARIA IN MIZORAM

Kumin January atanga July thla inkarah Malaria vei mi 12290 awmin heng zingah hian mi 5 in nunna an chan.

Health and Family Welfare thuchhuah tarlan danin kumin chhunga Malaria vei mi 12290 zingah hian Malaria PF mi 6349 an awm an, nunna chan mi 5 awmin nunna chan zawng zawng hi Lawngtlai District mi leh sa vek an ni.

Vawiin khan H&FW Department hnuaiia National Vector Borne Disease Control Programme (NVBDCP) chuan DHME Auditorium, MINECO-ah State Review Meeting an nei a,

Meeting-ah hian Kumin Jan - July chhunga natna hrang hrang Malaria, Dengue leh Chikungunya a Mizoram dinhmun te thlir let a ni a. Kumin chung hian kumdang zawng aiin Malaria PV a pung ni a report niin kumin hian Dengue vei hmuh chhuah tawh zat hi mi 267 niin, Chikungunya vei hmuhchhuah tawh zat hi mi 3 niin report a ni bawk.

Mizoramah hian District 4 heng, Lawngtlai, Lunglei, Mamit leh Siaha District-te hi Malaria tam zual biknate an ni a, a bikin International Border - Bangladesh leh Myanmar ramri hrulahte Malaria hi a tam zual ni a report a ni.

H&FW Principal Director Dr Vanlalsawma chuan natna laka invenna kawnga sawrkar hmalakna hrang hrangte tha taka kalpui mek a nih thu a sawi a, hmun thenkhata thawktu indaih lohnate pawh siam rem zel a nih thu sawiin, Malaria tamna hmuna thawktu te pawh theih tawp chhuaha thawk sauh sauh turin a fuih a ni.

NVBDCP hnuaiiah hian Malaria natna laka invenna thosilen damdawia chiah sa sem te, thosilen pangngai damdawia chiah sakte leh chenna in chung thosi hlo a kahte kalpui mek a ni.

<><><>

HAR GHAR TIRANGA

India ram zalenna champa vawi 78-na lawmna hmahruai, In tina Hnam Puanzar zar tura hriattirna (Har Ghar Tiranga) pual Concert chu waviin khan Art & Culture Dept. buatsaihin Aizawl Vanapa Hall ah neih a ni a. Art & Culture Dept. hotute bakah, Zirlai thahnem takin he hun hi an chhim a ni.

Art & Culture Dept. Secretary Pi Florence Zotluangpuii huan thu sawiin, Har Ghar Tiranga chu India ram hun hlui thlir letna atana awmze thui tak nei a nih dante tar langin Hnam Puanzara rawng hrang hrang awmzia leh an entir te sawifiahin 'Har Ghar Tiranga' chu inpumkhatna, 'Unity in Diversity' lantirna pawimawh tak a nih dante sawi a ni.

"Har Ghar Tiranga" Concert hi thalaite thirlunga India ram zalenna hlutzia intuh thar nana buatsaih niin nimin lamah Har Ghar Tiranga puala Kawngzawh neih a lo ni tawh bawk a ni.

BJP Mizoram Thalaite huaihawtin, waviin khan Har Ghar Tiranga puala Bike Rally neih a ni a, Dr K. Beichhua, MLA, State Core Group Member-in Flag Off a nei a, member thahnem takin kawng an zawh a ni.

Saitual - ah pawh waviin khan "Har Ghar Tiranga campaign" neih chhunzawm a ni a, Pi Chhuanhlupuii, SDEO kaihhruaiin CI Kawn leh Keifang Centenary Park inkarah Saitual DC hovin kawng zawh a ni a, school leh college zirlai thahnem tak an tel a ni.

Mamit district-ah India ram zalenna lawmna champa puala "Har Ghar Tiranga" kawng zawhna hun hi Mamit Bawrhsap Pu Jacob Lalawmpuia kaihhruaiin neih a ni a, Pledge chham rualna hun hman a ni a, zirlai leh department hrang hrang hotute leh staff ten hnam puanzar kengin Field Veng Mamit atanga High School Veng Mamit thleng kawng an zawh a ni.

Serchhip district - ah pawh Har Ghar Tiranga pual kawngzawh hi Serchhip Bazar atanga chhim lam, AOC kawn thleng neih a ni a zirlai thahnem takin kawng an zawh a ni.

<><><>

GOVERNOR

Larsap Dr. Hari Babu Kambhampati an Aizawl a (National Institute of Electronics and Information Technology)NIELIT, chu waviin khan a tlawh a. NIELIT building leh hmunhma te fangin, Cybersecurity Laboratory, Electronics Laboratory leh IT Laboratory te a tlawh bawk. Waviin NIELIT a tlawhna-ah thu sawiin, Larsap chuan NIELIT hi thangkhat lian vel chauhva upa ala ni nâ-in, mi sang tam takin an chhawr tangkai tawh a, tunah Lunglei NIELIT Extension Centre pawh bunfel tawh a nih thu a hriat chuan a ti lawm hle a ni, a ti.

Larsap chuan IT khawvelah sawrkar laipui pawhin Digital India campaign duangchhuakin, ngawrh takin a kalpui mek a ni a ti a. Kum 2047 ral hma ngeia India ram chu ram hmasawn leh changkang (Viksit Bharat) nih tir chu Prime Minister thiltum pakhat a ni a ti.

NIELIT a tlawhna-ah hian NIELIT thuneitu te chuan Artificial Intelligent(AI) Laboratory din chungchang te, NIELIT chu Deem University a pawm mai tur a ni tawh avanga Ram an mamawh belh chungchang te, LDC hna dil nana NSQF aligned Certificate pawm sak ve tura an duhna te Larsap hnenah hian an lo thlen a. Larsap pawhin lo bawhzui a tum thu a hrilh a ni.

Governor hian NIELIT a tlawh hriatreng nan a phun nghal a ni.

<><><>

VICE PRESIDENT

Vice President Jagdeep Dhankar chuan vawiin khan New Delhi-a Bharat Mandapam atangin Har Ghar Tiranga Bike Rally a vailiam. He hunah hian Union Culture minister Gajendra Singh Sekhawat leh Parliamentary Affairs Minister Kiren Rijiju te pawh an tel a. Major Dhyan Chand National Stadium thleng an tlan a ni. Har Ghar Tiranga hi hnam puanzar ti lar tura beihpui thlak mek a ni..

<><><>

DOCTOR STRIKE

Kolkatta-a doctor training lai pawngsual leh thah anih avangin rampumah doctor ten lungawilohna an lan tir mek. Federation of Resident Docotors Association (FORDA) chuan he lungawilohna lantirna huaihawtin ramchhunga hospital doctorte an nuar a. Maharastra-ah pawh emergency duty tihloh chu an nuar vek a. Medical college-a senior medical teacher, lecturer te leh zirchhuakte ten heng damdawiin te hi an enkawl mek a. Maharastra State Association of Resident Doctors (MARD) chuan nimin khan thuchhuah siamin RG Kar Medical College, Kolkatta-a nuar mekte chu an thlawp thu an sawi a ni. Jharkhand ah pawh Rajendra Institute of Medical Sciences (RIMS) ah chuan junior doctor te tiamchin awm loin an nuar a. He pawikhawihna hi CBI chhui ngei an phut tih an sawi a ni.

<><><>

NEPAL

Nepal Forest and Environment Minister Ain Bahadur Shahi Thakuri chuan fur ruahtui tlak laiin thing tiak maktaduai 10 tal phun turin an hnuaia thawktu hrang hrangte a hriattir. Nepal ah hia nfuur hi June ni 13 ah intanin September ni 23 thleng a awn thin a. Minister Thakuri chuan forest office zawng zawng, Soil Conservatoin and Watershed Management Office, national park, reservoir area leh tualchhungah he beihpui hi thlak a ni ang a ti.

<><><>